

պում էին պատարագ մատուցանել կամ այլ ծեսեր կատարել: Ես երբեք չեմ կարող մոռանալ, երբ այսպիսի հանդեսներից մեկի մեջ խանը հրամայեց քահանային սաղաւարտը դնել իր շան գլխին, շուրջամը գցել նրա վրայ, եւ ստիպեց տերտերին իր բուրվառով խնկարկել շանը: Տերտերը ի հարկէ չկատարեց հրամանը: Ողորմելի քահանային շան հետ միասին գցեցին մի տոպրակի մեջ, բերանը կապեցին եւ սկսեցին բազմութեան ամօքէ փայտով ծեծել: Քահանայի հառաչանքը, շան կնձկնձոցը, միախառնուելով միմեանց, դարձեալ զոարճութիւն էին պատճառում անգուրթ բարբարոսներին:

Մահմեդականները չունէին զօրանոցներ: Հայոց վանքերը եւ եկեղեցիները միշտ ունեցել են եւ ունէին օթեւաններ, եւ պատերազմների ժամանակ նրանք դառնում էին մահմեդական զինոորների բնակարաններ. իսկ սուրբ տաճարը, որովհետեւ աւելի ընդարձակ էր, գործ էին դնում որպէս ախոռ ձիաների համար: Ի հարկէ, միեւնոյն ժամանակ կողոպտում էին ինչ որ գտնուում էր տաճարի մեջ: Շատ անգամ եւս վանքերը եւ եկեղեցիները ծառայեցնում էին որպէս ոչխարների ձմեռանոցներ: Ի՞նչ հայ կարող էր ընդդիմանալ, ո՞վ կարող էր մի խօսք ասել, նրա լեզուն իսկոյն կը կտրէին:

Քանդոած վանքերը, եկեղեցիները կրկին նորոգելու կամ կարկատելու իրաւունք չկար: Շատ անգամ պատահում էր, տաճարի կտուրը ծածկուում էր կամ ճեղքուում էր. ձիւնը, անձրեւը, ցած էր թափուում: Որմնադիր հրաւիրել անկարելի էր: Վարդապետները, քահանաները, եթէ միջոց էին գտնում, շինում էին գաղտնի, այն եւս գիշերով: Ծա՛նր էր մի այսպիսի յանցանքը, եթէ յայտնուէր նա. պատիժը վերջանում էր ամենասարսափելի կերպով: Նոր վանքեր կամ եկեղեցիներ շինելու թոյլտւութիւն չկար. այդ կարող էր յաջողուել այն ժամանակ միայն, երբ մի մեծ գումարով քիրստօնեաները կը գնէին այս եւ այն իշխանի հաճութիւնը: Իսկ զանգակի ձայն ամենեւին չէինք լսում. զանգահարութիւնը արգելուած էր:

Մահմեդականների հալածասիրութիւնը ոչ միայն բռնաբարում էր քրիստոնեաների կրօնական ազատութիւնը, ոչ միայն սրբապղծում էր ամեն ինչ, որ նրանց համար նոյնական եւ աստոածային էր, այլեւ արատաւորում էր նրանց ընտանեկան պատիւը: Ես գիտեմ հարիւրաւոր եւ հազարաւոր օրինակներ, թէ որպէս հայ կինը, հայ աղջիկը զոհուում էր մահմեդականի անբարոյական կրթերին: Ես երբեք չեմ կարող մոռանալ, — այս պատահեց մեր քաղաքում — երբ խանի սպասաւորները եկան իրանց տիրոջ համար տանելու մի աղջիկ. հայրն երկար աղաչում էր, որ չխլւեն իր աղջիկը: Երբ հօր արտասուքը չկարողացաւ շարժել նրանց գուրթը, նա առեց մի դանակ, եւ խրտելով իր դստեր կուրծքի մեջ, ասաց՝ «հիմայ տարէք այս դիակը»: Նոյն օրը